

FURÚMIÑETU LIGÁRADAN PÁBLO LUN TIMOTÉO

Labúrïjan Páblo lun Timotéo

¹ Áu Páblo, láni Jesucrïstu apóstolu áu, nouñajoún láu lugúmadin Búngiu le Wasálbaragüle lúma Wabúreme Jesucrïstu, le uágubei weménigida lun webélurun siélun.

² Nabúrïjañoun gárada to bun, Timotéo, niraú le tímati-maati lídan wafñnen luágu Jesucrïstu. Resíbibeí abíniruni, gudémejabu lúma darángilaü lúmagiñe Wáguchi Búngiu lúma lúmagiñe Jesucrïstu le Wabúreme.

Ewéridijani lueí arúfudajani le maríchabei

³ Queí meja nayúmuragun bun dán meja le nídinbei Macedónia, reídeimemebá ubúругu Éfeso lun baríñagun joun ítaga güri-gia lun marúfudajan jamá cátei le maríchabei, ⁴ meténi jagíame lún buri úraga le magúmuchaditi jawágu jenébaanfaangu binádu mútu. Cátei buri le, barúrügüti sigénei le málati, ani míderagun lumútiña güri-gia lun jesériwiduni Búngiu láu jafñnerun luágu.

⁵ Le lúnbei barúfudajani joun afñnetiña jagía, lun jín-siñegua jamá jámagua lugúndun jarúmaaru tan janígi, míchujali jarítangun dúru jawágu, áni buídujali jafñnerun.

⁶ Añájein, adíreirutiña lueí buri cátei le, ába jíchaagun jóungua lídoun buri sigénei málati. ⁷ Buséñtiña buri lun arúfudajatiña jamá lídan lúruđu le líchugubei Búngiu lun Moisés, úati gunfaráanda jamáni ni le guánarügü jaríñagubei ni le jarúfudajabei luágu lúruđu ligía láu sarágu afññeni.

⁸ Subúdi wamúti luágu buídu lan lúruđu, yúsuwarúgaali ligía quei lubúdubu. ⁹ Lúnti lasúbudirúniwa luágu máma lan joun ja adúgübalin le buídubei ladúgüwa lúruđu, lúruđu jóunti ja wuríbabaña, ja magáambadibaña, ja mebéresenbaña láu Búngiu, ja gafígounbaña, ja minébenbei Búngiu lúma cátei lánina Búngiu joun, ja áfaruti jáguchi o jáguchu jilágubei, joun sun ja gáfarajadibaña, ¹⁰ joun ja agámaridubaña mamárieidunga o ja agámaridubaña wügúriña jáledigu, joun ja íwerujabaña gürígia, joun ja yéebaña, jáma ja áfiñurubaña luágu iyéeni. Jóunti gíñe sun ja adúgübaña ámu cátei múaradunti láu arúfudajani jarúmati. ¹¹ Arúfudajani jarúmati le, úarati láu ugánu buíti luáguti asálbaruni le loúnajabadiña Búngiu, le weírigubei, le fuleísei láalibeí gürígia, apúrichija.

Eteíngiruni luágu lugúdemejabu Búngiu

¹² Teínqui numúti Wabúreme Jesucrístu, le íchugubei ubáfu nun lun wadágimanu le, luágu lanúgünina queísi ában wügúri derégüdaguati, lúma luágu líchugunina lun nesériwidun lun. ¹³ Adúga láali sun cátei lé buri nun láu sún meja anábagua náni, eíbaaja numútiña meja ja afálarubalin, adúga numúti meja sun le nuáraati lun nagúmuchaguagüdüni jafíñen. Ába gudéme nan lun Búngiu lugúndun mámagidina meja afíñeti luágu Jesucrístu áni ibídiñeti meja nun ca lan nadúgübei. ¹⁴ Ligía luweírinbei nasándiruni labínirunina Búngiu, úara lúma afíñeni lúma ínsiñejabuni le gíñe wawágubei luágu lídaañadiwa lan ában lúma Jesucrístu.

¹⁵ Inárüni cátei le, le tímatimaati, áni lúnti jafíñerun súngubei luágu inárüni lan. luágu “liábin lan Jesucrístu ubouágun lun lasálbaruniña gafígountiña”, áu furúmiñeti

jádaangiñe. ¹⁶ Ligía nagúdemedunbei lun Búngiu lun gayáraabei lan larúfuduni Crístu sun lugúraasun nuágu, áu le furúmiñebei jádan gafígountiña. Ítara líña niábin lun ábanbadina lan jémpulu joun ja lúnbaña jaffínerun luágu, lun jabíjini ibágari magúmuchaditi. ¹⁷ ¡Ligía rúwama lubeí uweíriguni lúma inébesei lun Búngiu le Warúeitebei lun sun dan, súnwandan, le moúwedadibei, siñá ligía larijíniwa, le Búngiu le ábanrügüti, le sábiu! Ítaralá.

¹⁸ Timotéo, niraú, rúnumuti gumádi le bun lun bageíndaguni luwúribun Búngiu buídu, queí meja laríñaguni Búngiu jayúmulugugiñe wadújeñu lueígiñe Jesucrístu bun, ragúñubeí inárüni lánina asálbaruni, adúgeina le basúbudirubei luágu richá lan. ¹⁹ Añájein gürígia, féridi jamúti jaffínen ladúga madúgün jamá gásu láu le jasúbudirubei luágu richá lan. ²⁰ Ítara líña lasúseredun lun Himenéo lúma Alejandro ja nedéregerubaña lun Máfia lun jafúnrendeirun lun manábagun jamáni Búngiu.

2

Arúfudajani libúgürü ayúmuraguni lun Búngiu

¹ Furúmiñeti cátei, amúriajatina lun ladügúniwa ayúmuraguni lun Búngiu jawágu sun gürígia. ² Lúnti wayúmuragun jawágu gumádimatiña, lúma jawágu sun lúrudugu lun gayára lan wabágaridun ában ibágari darángilati, le derégewati lun Búngiu, le gíñe inébewati lídan sun luwúyeri. ³ Buíti cátei le, gúndaati gíñe Búngiu le Wasálbaragüle láu, ⁴ le busénbei lun jasálbarun sun gürígia, lun gíñe jayábin lun jasúbudiruni inárüni lánina wasálbarun. ⁵ Ában rügúñein Búngiu, ában rügúñein gíñe gayára ladímurejan waweígiñe ligíbugiñe Búngiu, wügúri le Jesucrístubei. ⁶ Derégeguati Jesucrístu lúngua

lun loúnwen lun lafáyeiruni lebégi jasálbarun sun güri-gia, ában lasúbudirawagüdün cátei le lídan lidáani. ⁷ Lun cátei le, loúnajana Búngiu lun narúfudajan joun ja mámabaña juríu libúgürü inárüni le, lun gayára lan jaffínerun luágu Crístu queísi Jasálbaragüle. Áu, queísi ában affíneti luágu Crístu, inárüni naríñagubei, mayéejatina.

⁸ Ligía nabúseerúnbei lun jayúmuragun wügüriña lídan sun fulásu, iñúrañu jájabu láu tarúman anígi, úouga igáñi ni asígenejani jádan jáma jíbiri güri-gia lídan le jayúmura-gun lun Búngiu. ⁹ Manárimelá tuwéndegun jadáura-gun würiña, lun máma lan láu amúriguni janárimeguti jaráanseragua jóungua, ni láu gólu, pérlas, o daúguaü séruburitu, ¹⁰ lun láu lan lubuídun igáburi jadáuragua jóungua quei lúnti lan jadúgün würiña ja derégeguañabaña jóungua lun Búngiu. ¹¹ Lúnti maní jamá würiña dan le larúfudajoúniwa joun, lúnti jerésibiruni arúfudajani ligía láu ában únabuni. ¹² Májatina lun tarúfudajan würi lídan jadámurin affínetiña, ni lun tagúmadiruni würi wügüri, lúnti teréderun maníñu. ¹³ Lugúndun Adán ladúgübei Búngiu furúmiñe, lárigiñe, ladúgoun Éva. ¹⁴ Máma gíñe Adán leyéedubei Máfia, würi ayeedúaboun, áni láu tay-eedúniwa, ába táburujan lídoun figoú. ¹⁵ Láu sun líra, jasálbaruba würiña láu jagúnfulirun láu le lúnbei jagún-fuliruni queísi úguchuru, ánjein ítara méme jaffínerun luágu Crístu, arúfuda jagía ísiñejabuni lúma arúmani láu igáburi buíti.

3

Ligáburi ída lúba lan jóuserun fádorigu

¹ Inárüni cátei le. Ánjein abúseera ában güri-gia lun fádiribei lan, ában wadágimanu buíti labúseerúbei

ladúgün. ² Lun fádiribei lan ában gürígia, lúnti labágaridun ában ibágari le míchuti lúgaaru lun ladeinjouniwa lun. Lúnti túmari lan ábanrügü wúri, lúnti gíñe lanúgün ában ibágari sériuti, buíti lichúgü, inébewa. Lúnti aráanseñu lan sun dan lun lerésibirun bisída lúbiñe, lúnti buídu lan larúfudajan, ³ moún lumuti gátadi lan, manígi wuríbu, mabúseerun ligíame seínsu le marúmaanti lagáñeirúniwa. Lubáragiñe líra, lúnti areída lan, dilí ligíame, manígi ligíame seínsu. ⁴ Lúnti gayára láníña tílana lúban agúmadira buídu, lun gíñe ladúgün lun gagáambadi jamá lirájüñü, inébejabu. ⁵ Lugúndun ánjein magúmadirun lubáliña wügúri tílana lúban, ¿ída lubági gayára lan laríjin jáu tílana lilígilisin Búngiu? ⁶ Moún lumuti lubeíti fádiri lan ában iséri afíñeruti lueí lanáangun lúngua sarágu luágu lubára, ábame láburujan lábugiñoun ínarawaguni le gádaanbalin Máfia. ⁷ Lúnti buídu lan ligáburi, lúnti gíñe inébe lan joun ja maffíñebaña lueí ladímurejoun wuríba luágu, ábame láburujan tídoun lisádarán Máfia lun lagúnrinchawagúniwa lubuídun líri.

Ligáburi ida lúba lan jóuserun ja esériwidubaña ligílisirugu

⁸ Ja gíñe esériwidubaña ligílisirugu lúnti wügúriña jamá ja inébewatiña, lúnti jagúnfulirun láu jerérun, moún lumuti jabácharuadun, ni lun línsiñedun seínsu joun. ⁹ Lúnti jarúgüdüni inárüni lánina afíñeni le arúfuda láalibei Búngiu woun, buídu, lun gíñe jarúma tan janígi. ¹⁰ Lúnti jouchún, lárigiñeme, ánjein úa lubeí mégeiti luágu lubuídun jagáburi, ligíaba gayára lan jesériwidun ligílisirugu. ¹¹ Würíña ja esériwidubaña ligílisirugu, lúnti gíñe inébewa jamá, moún lumuti marásualugu jamá, lúnti sériu jamá, derégüda lídan sun cátei. ¹² Ában esériwiduti ligílisirugu, lúnti túmari lan ábanrügü wúri, lúnti gíñe lagúmadiruniña lirájüñü buídu jáu sun tílana lúban.

¹³ Lugúndun esériwidutiña ligílisirugu ja adúgübalin jawádigimari buídu, buídubei ladímurejoúniwa jawágu, áni ragútimaatiña anígi lun jadímurejan luágu jafñen luágu Jesucrístu.

¹⁴ Agúrabatina nídin aríjabu madíse, ¹⁵ nabúrújaní buri cátei le bun lun ánjana lan adárasaragua, lun subúdi báni ída líña lan lun louuserun gürígia jádan lufámilian Búngiu, to lilígilisinboun Búngiu le wínwanbei lun sun dan. Lilígilisin Búngiu ágüdajabalin linárün, toúnigiteí inárüni ligía buídu. ¹⁶ Siñáti lasígenerúniwa luágu weírigu lan Wasálbaragüle Jesucrístu, le subúdigüda láalibei woun.

Arúfudaguati Búngiu lúngua queísi gürígia lídan Jesu-
crístu,

arúfudaleí Sífiri Sándu luágu úaragua lan Jesucrístu.

Aríja jameí ánjeligu.

Apúrichijouáti luágu joun lílana sun fulásu,

afñewa luágu lídan sun fulásu,

resíbiwa ligía siélu.

4

Ja lúnbaña jígiruni jafñen

¹ Furáanguti laríñaguni Sífiri Sándu luágu lídoun lánme lagúmujoún dan, añájeinbaña lan gürígia ígiruti jafñen luágu Crístu, jafálarame espíritugu ja ayéejatiña lúma arúfudajani le jámagiñeti máfianu. ² Jagáambajaba arúfudajani jámagiñe gürígia biángua tigíbu, yéetiña,

ja masámdirunbaña ni cáta tídan janígi camá jamuga churáwaaru láu ában gürábu súti. ³ Gürígia jagía, aríñagatiña luágu mabuídun lan lun jagámaridun gürígia, aríñaga jagía luágu níjein lan eíginini moún lumuti leigín, láu sun ladúga lan Búngiu eíginini buri ligía lun jeíginini ja afñebaña jáma ja subúdibalin inárüni, láu ateíngiruni

lun Búngiu luágu. ⁴ Sun cátei le ladúgübei Búngiu buíti, moún lumuti wamájarun lun ni cáta lídaangiñe, lúnti wánjarun lun sun le adúga láalibei, teínqui wameíme luágu. ⁵ Lugúndun láu wamúriajan lúma Búngiu lun labíniruni sun weígin, ñúbinti lun labuídurun láu lerérun, lúma láu wayúmuragun lun luágu.

Ában esériwiduti buíti lun Jesucrístu

⁶ Ánjein barúfudaja cátei le joun wadújeñu lueígiñe Jesucrístu, ábanbadibu esériwiduti buíti lun Jesucrístu, áni tágüdajouba buwáni láu buri dimúrei le lánina wafíñen, lúma arúfudajani buíti le falábaalíbei. ⁷ Meféridirabeí bidáani asígeneja luágu buri libídiegun úraga le ni cá-tati ligíbugiñe Búngiu, lubáragiñe líra, áfaaguabá lun bagúnfulirun lúma Búngiu. ⁸ Láu sun ju lan lánjingichún úgubu, jútimaati bánjingichagun búngua lídan bagún-fulirun lúma Búngiu, lugúndun barúti cátei buíti woun lídan ibágari le lúma lídan ibágari le lúnbei wabíjini. ⁹ Inárüni cátei le, áni lúnti jafíñerun súngubei luágu. ¹⁰ Ligía lébubei wawádigimaridun, súfuri wagía anabúni, lugúndun rúwamaali lan wemenigi luágu Búngiu le wín-wanbei, le aráansejaalibei asálbaruni joun sun gürígia, áni ja afiñebaña luágu, jerésibirubei asálbaruni ligía.

¹¹ Ligía buri cátei lúnbei barúfudajani lun jagúnfulirun gürígia láu. ¹² Sériulá bigáburi lun manügúniwa ban quei ni cáta lueígiñe ñúraügidibu lan, lubáragiñe líra, lúnti ában ban jémpulu buíti joun ja afíñebaña, lídan ligáburi badímurejan lúma bouserun, lídan ínsiñejabuni, lídan bafíñen luágu Búngiu, lúma lídan larúma bibágari. ¹³ Rúguabá búngua lun balíjanun Lerérun Búngiu lun adámurini, íchiga gurásu joun wadújeñu lídan jafálaruni, arúfudaja joun daríme lun nachúlürün. ¹⁴ Yúsubeí ubáfu

le líchugubei Búngiu bun dán meja le jíchugunbalin tábutigu ligílisi jájabu bábulugu, adímurejeina jagía dimúrei lúmagiñe Búngiu bun.

¹⁵ Derégeguabá búngua lún buri cátei le, lun gayára lan larijíniwa bawáanserun lídan cátei lání Búngiu.

¹⁶ Goúnigiguabá búngua, lúma láu le barúfudajabei, ítaramemebá derégüdagu lídan sun cátei. Ánjein badúga ítara, basálbaruba, sálba jagíame gíñe ja agáambubalibu.

5

Ída lúba lan ligáburi louserun Timotéo jáma afíñetiña

¹ Madeínjabá lun ában weírei mútu, lubáragiñe líra, adímurejabá lun camá jamuga lun búguchi, oúsera báñame wügúriña ñúbürigiña queisi bamúlenu. ² Oúsera báña weíyaaña würiña quei bouserunun búguchu, oúsera báñame würiña irájüñü quei bítunu, láu lubuídun arítanguní.

³ Íderagua báña würiña ja jiláañabaña úmari, ja aríjúabei luágu mégei jamá iderúni. ⁴ Ánjein garájüñü tubeí ában würi to jiláali túmari, gabáña tugúya, lúnti jafúnrendeirun irájüñü jagía lun jeténirun furúmiñe lun le jemégeirubei jafámilian lúma lun jágyugüdüni ínsiñejabuni le jadúweirubei joun jagúbürigu, lugúndun buíti cátei le, gúndaati gíñe Búngiu láu. ⁵ Würi to jiláali túmari, to eréderuboun tábugua le tímatimaati, rútumuti teménigi luágu Búngiu, merédeti gíñe tayúmuragun lun Búngiu áriebu, wéyuagu. ⁶ Ánjounti to edéregeraguboun túngua lun ugúndani lánina ubou le, jiláñu tíña lun cátei lánina Búngiu láu sun wínwangiru lan. ⁷ Aríñagabeí buri gíñe cátei le joun, úa lámuga ni cáta lun ladeinjoún joun luágu. ⁸ Le marítagunti jawágu lánigu, játima lidújeñu,

magúnfulinjali lúma lafíñen, wuríbatimáatiti sügú láu ában güriquia le mafíñeti.

⁹ Lun labúrüdúniwa tíri wúri to jiláalibei túmari tídan gárada lánina íderawagúni, to rügúboun níjeinjali lúmagiñe úrüwa-wein irúmu táu, lun gíñe ábanrügügili lán meja túmari. ¹⁰ Lúnti tasúbudirúniwa luágu buíti le tadúgübei queí buri jamúga ánjein meja agúriaja tubáliña tirájüñü buídu, ánjein buídu lubeí touserun jáma ja achúlürübaña túbiñe, ánjein seríwi tubáliña idújeñu lueígiñe Crístu manáangunga túngua, ánjein íderagua tubáliña ja asúfurirubaña, o ánjein adúga tubeí furúmieguaügü ámu cátei buíti.

¹¹ Würíña ja jiláaña úmari ja ñúbürigiña, mabúrüdabeí jíri tídan gárada, lugúndun lachúlürüba dan lúnya jabúseerun jámari. Ábameti jígiruni jesériwidun lun Búngiu ligílisirugu lúnya jamárieidun. ¹² Ábameti jadímurejan güriquia jawágu ladúga jadúraaguni jadáradun lúma Búngiu le lánina jesériwidun lúnrügu súnwandan. ¹³ Ába jayábin lun jamágualigudun, mámarügü jamágualigudun, ába gíñe marásualugu jamá, eméteja lídoun sun cátei, adímureja cátei le moún lumuti. ¹⁴ Ligía nabúseerúnbei lun jamárieidunya ja ñúbürigiñabaña, lun garájüñü jamá, lun jounigirunun jában, lun míchugun jamá lúgaaru joun ja mafíñebaña lun jadímurejan wuríba jawágu. ¹⁵ Añájein würíña, ígira jamáali Búngiu, ába jafálaruni Máfia.

¹⁶ Ánjein añájein jabeí würíña ja jiláalibei jámari jádan lufámilian ában afíñeti wúri o wügúri, lúnti líderaguniña, mígirun ligíame lun ában jamá ijúrugu tun ligílisi, ítara lúba gayára lan jíderaguniña tílana ligílisi würíña ja busénbaña jíderawagún.

¹⁷ Fádirigu ja lábugiñeñounboun jaríajaan ligílisi, ja adúgübalin jawádigimari buídu, lúnti inébewa jamá sarágu, játima gaffsiutebalin apúrichijani lúma arúfudajani. ¹⁸ Taríñajare Lerérun Búngiu. “Magúragua jumeí liyúma jilúgün bágasu le lánina wadágimanu lueí lásiñerun legin lídaangiñe tubúñe fulúwaaru le uágubei ladúgüragua lun lagídaruni túra.” Aríñagatu gíñe. “Garíchatí ñadágimeinti lun libíjin lafáyeiruaaja.”

¹⁹ Madúgabá gásu luágu líchugún lidúnrun ában fádiri ánjein úa jabeí biáma o úrúwa lun jíchugun fe luágu lidúnrun. ²⁰ Ánjaña ja asígirubaña lídan figoú, lúnti badeínjan joun jagíbugiñe sun afíñetiña lun janúfudedun sún-gubei lueí jafígounjan. ²¹ Ayúmuraguatina bun ligíbugiñe Búngiu lúma Wabúreme Jesucrístu, lúma jagíbugiñe án-jeligu ja lanúadirubaña, lun bagúnfulirun lúma buri gumádi le, lun ában lan láu janügúniwa sun gürígia. ²² Míchigabádúgabá gásu luágu líchugún lidúnrun ában fádiri ánjein úa jabeí biáma o úrúwa lun jíchugun fe luágu lidá ni ában queísi fádiri tídan ligílisi lídan loufudagun, lúnti batúriajani ligáburí buídu lueídügü gaffígoun lan, larijívameti camá gúndaatibu láu lifígoun. Dísebá lueí sun le wuríbabei.

²³ Quei súnwandan lan gári lan burágeirugu, mátabá dúnarügü, gurába gíñe murúsun diweín.

²⁴ Lídan le báluajaniña wügúriña lun jesériwiduni Búngiu ligílisirugu, jarítaguabá luágu añájein lan gürígia arijúati jafígoun furáangu lubáragiñe jagúserun, añájein gíñe, marijínti jafígoun darí lárigiñe. ²⁵ Ítara méme líña gíñe, cátei buíti le jadúgübei gürígia, arijúati furáangu, áni ibini marijín lan, siñátí leréderun arámudagu lun sun dan.

6

¹ Affñetiña ja músubaña, lúnti weíri lan jinében jayúbudirigu joun, lun madímurejóun lan wuríba luágu líri Búngiu, ni luágu cátei le warúfudajabei. ² Ánjein añajein lubeí esériwidutiña gayúbudiritiña affñetiña, moún lumuti lougua lan jinében joun ladúgarügü jadújeñu jamá lueígiñe Crístu. Lubáragiñe líra, lúnti jesériwiduniña buídutima, lugúndun ja erésibirubalin lubuídun jesériwidun, affñetiña, idújeñu gíñe jínsiñegutiña. Arúfudajabei cátei le, apúrichijabeíme.

Arúfudajani maríchatí lúma irisini inárüni

³ Ánjein arúfudaja ában gürígia cátei maríchatí áni múaraanti lúma larúma arúfudajani le láni Wabúreme Jesucrístu le íderagubaliwa agúnfulira lúma Búngiu, ⁴ ában barúgua túngua gürígia ligía, le ibídiñeti ni cáta lun. Ganígiti lasígenejan luágu buri dimúrei, lídaangiñeti asígenejani le liábin buri gimúgaü, gáñiguaü, anábajani, mafíñeni joun gürígia, ⁵ lúma buri wuríbu magúmuchaditi. Jíbiri gürígia ja, wuríbati jasáminan, ibídiñejabutiña lun inárüni, jarítaguatiña luágu lébuna lan lagáñeirun irisini agúnfuliruni lúma Búngiu. Disebá jaweí gürígia ja ítarabaña. ⁶ Inárüni luágu ában lan oúnwenbun irisini agúnfuliruni lúma Búngiu lun le gufúrumabei láu le lúmabei. ⁷ Manúgüntiwa ni cáta wámagua ñájoun uboúagun, siñábei gíñe wanúgün ni cáta yágiñe, ⁸ ánjein geígin wabeí, ganáangun, lúnti gufúruma wamá láu líra. ⁹ Ánjaña ja busénbaña jarísidun, mawándun jamúti oúchwagúni, ába jáburujan tídoun lisádaraana sarágu lagúbüri ayúmajani le málati, le ásiñeragüdübei gürígia jebélurun siélun, ába jóudin máfiougatin. ¹⁰ Línsiñegu seínsu ligía lílagülebei sun luwúyeri wuríbani, áni añajein sarágu

gürígia ladúga jóuchun jabíjin seínsu, ába jígiruni jaffñen luágu Crístu, buíngüda jamáaliti jabágari guánarügü láu asúfuriruni.

Wuríbu buíti le lání afñeni

¹¹ Ánjabuti amúrü, Timotéo, queísi ában ban wügúri derégeñuti lun Búngiu, anúrajabá lueí buri cátei le. Barúba ában ibágari le lánina ísuruni, le lánina gúnfuli lúma Búngiu, le lánina afñeni, le lánina ínsiñeni, le lánina gagúraasuni lúma areíduni. ¹² Áfaaguabá buídu luágu lání wafñen fuleísei, ábame bagáñeiruni ibágari le magúmuchaditi, lun líra lagúara Búngiu bun dán meja le barúfudunbalin jagíbugiñe sarágu gürígia luágu aráanseñu bíña lan lun bafálaruni Crístu. ¹³ Guetó, ligíbugiñe Búngiu le íchugubei ibágari lun sun cátei, lúma ligíbugiñe Jesucrístu, lé meja gíñe geféenbei luágu le inárünibeí ligíbugiñe Piláto, ¹⁴ buséntina lun bídin láu le nubeíbei bun táu sun tarúma banígi, úa lámuga cába lan uágu ladeinjoúa bun, darí liábin Wabúreme Jesucrístu. ¹⁵ Dánme lachúlürün dan ligía, le lanúadajabei Búngiu, lagíríbuduba Crístu ubouágun, Búngiu rügúñein weírígu, Súnti Gabáfu, Jarúeite urúeigu, Jabúreme abúremeinigu. ¹⁶ Ligía rügúñein mouwedadi, le abágaridubei lídan larúgounga le ñíjin lubeí mayarafadun lan ni ában. Maríjin lágili ni ában gürígia Búngiu, siñáti gíñe larijiniwa. ¡Rúalá uweíríguni lun, arúfudualá lubáfu lun sun dan! Ítaralá.

¹⁷ Ja gámabaña irísini lánina ubou le, aríñagabá joun lun manáangun jamá jóungua luágu, míchugun jameíme jeménigi luágu irísini ligía, lugúndun machourunti, lun jíchuguni jeménigi luágu Búngiu, le wínwanbei, áni rúleí sun cátei woun gíbe lun wagúndaarun luágu. ¹⁸ Aríñagabá joun lun jadúgüni le buídubei, lun buídu lan jóuserun le tímatimaati, lun aráanseñu jamá lun jíchuguni lúma lun

jafánreinruni le jámabei. ¹⁹ Ítara lúba jóúndaragun irísini jóúngua siélu le adúrarubei lun sun dan, ítara lúba jabíjini ibágari tímatimaati le magúmuchaditi.

Lagúmujoún dimúrei lun Timotéo tídan gárada to

²⁰ Timotéo, toúnigibeí le íchugúbei lábugiñe baríaajan. Magáambabá dimúrei buri le lánina lisúbudin uboú, ni sigénei le lánina cátei le gíridügübei subúdi, ²¹ añájein já-daangiñe ja afálarubalin luwúyeri subúdi le, ígira jamáali jafíñen.

Biní lábu Búngiu. Ítaralá.

Lerérun Búngiu To Lánina Iséri Darádu New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
